



## Angajoqqaat siulluttarneq pillugu paasinnittaasiat iliuuseqartarnerallu

**Kalaallit Nunaat nunarsuarmi nunat siullunermik ajornartorsiuteqarnerpaat ilagaat.  
Ilisimatusaatigalugu suliap nutaap takutippaa ilaqutariinnut qanoq sunniuteqartarnersoq**

Kalaallit Nunaanni Inuit akornanni siulluttarneq nunarsuarmi qaffasinnerpaat ilagaat. Kalaallit meerartai inuunermi siusissumik siulloqqaakkajuttarput, missiliorneqarporlu kalaallit meerartaanit tamanit 9-14%-it siulluut sakkortunerusumik atortarpaat, ataavartumik maqisoormik taaneqartartoq.

Siulluttarneq tusaasinnaajunnaarnermik kiisalu ilikkarsinnaassutsimut ilisarsiniarnikkullu ineriartornermut annikillinerannik kinguneqarsinnaavoq. Aammattaaq misissuinerit takutippaat, siullunnerit inuunerup pitsaassusaata appariarneranik kinguneqarsinnaasoq - taamaattorli misissuinerit taakku pingaarnermik inuiqatigiinni eqimattakkaani Kalaallit Nunaannisuulli annertutigisumilli siulluuteqarneq ajortut akornanni ingerlanneqarput.

Ilisimatusarnikkut suliniummi "Forældres opfattelse og håndtering af mellemørebetændelse i Grønland"-imi siunertaasoq tassaavoq, paasiniassallugu qanoq qitornaqarluni siulluttaqattaartartumik ilaqutariit inuunerannut qanoq sunniuttarnersoq. Kalaallit Nunaanni pingasunik assigiinngitsuni angajoqqaanut qitornaminnik siulluttaqattaartartunik arlalinnik apersuinerit ilisimatusarnermut tunuliaqutaapput. Angajoqqaanik 27-inik qitornaminnik siulluttoortartunik 16-ileriarluni apersuisoqarpoq.

Ilisimatusarnermi paasineqarpoq, ilaqutariit meeqqanik siulluttartuutillit *tamarmik* sunnertittartut - annertuumillu sunnertittarlutik. Angajoqqaat amerlasuut imminnut pisuuttarlutik aammalu qitornatik uteqqiattumik siulluttarnerisa malitsigisaanik kangusuttarlutik ersersippaat, naak angajoqqaat qitornaasa siulluttarnerannik paasinninnerat nakorsat ilitsersuinerannit nassuiaanerannillu aallaaveqaraluartoq. Angajoqqaat ilaat imminnut pisuutillutillu kangusuttarput, kingunerisaanik inoqatiminnut imminnut mattuttarlutik. Taamatuttaaq angajoqqaat amerlasuut siulluttoortarnerup malitsigisaanik qitornaasa nappaateqaleratarsinnaanerannut naleqqiullugu ineriartornerat siunissaallu pillugit ernumassuteqarlutik ersersippaat.

Kalaallit Nunaanni siulluttarneq taamaalilluni siusinnerusukkat atuakkanit pioreersuniit ersersinneqareersuniit naleqqiullugu allanik kinguneqarnerungaatsiarsinnaavoq. Arlariaanik ajornartorsiutinit sunniivigeqatigiinneq pineqarpoq, matumani immiinnut pisuutinneq, kangusunneq inoqatinullu immiinnut mattunneq ilaqutariinnut eqqugaasunut ersarisumik ajornartorsiutaallutik.

Siulluttarneq pillugu angajoqqaat paasinnittarnerannik ilisimasat oqaloqatigineqarnerallu nakorsartitsartut katsorsaannermut periusissaannut toqqaanissaannut kiisalu inuaqatigiit peqqissusaat siammasissamik takullugu aalajangiisussanut pingaaruteqarpoq.

Ilisimatusarneq nunat tamalaat atuagassiaanni "International Journal of Pediatric Otorhinolaryngology"-mi saqqummersinneqarnikuvoq.


Suliniut Kalaallit Nunaanni Ilisimatusarnermut Siunnersuisoqatigiinniit Ph.d.-nngorniarluni ilisimatuutut ilinniarneq aqutigalugu aningaasalersorneqarpoq.

**Ilisimatusarnermit issuakkat toqqakkat:**

"Siusinnerusukkut illoqarfimmi aqqissuussisoqaraangat, soorlu assersuutigalugu timersortarfimmi, ilaasarnikuuvugut. Kisiannili aqqissuussanut taamaattunut ilaasaarnikuuvugut, aamma nalliuuttoqaraangat kaffisortitsisoqaraangallu ilaasaarnikuulluta. Amerlanertigut kisimiinnerusarpugut. Nalunngilarami inuit allat akornaniilerutta meeqqat siutai tipinnerartuaanassammassuk. Siutai salinngisaannarakkit?"

"Naggataatigut anaanaerluttut, angajoqqaajunerluttut misiginartarpoq Eqqortumik iliorpunga, sooruna napparsimaniinnalertoq? Taamannak eqqarsartoqalertarpoq. Uagut pisuussutigivarput, naak immaqa taamaangikkaluartoq, naluara".

"Sunnertinnarsuaarpara, atugarpullu artornaqimmat qasusorujussuusarattalu qaqutigoortumik misigisimasarpugut pilluarterujussuulluta. Aamma ulloq unnuarlu qiasumik tusaasaratta, taamaammat nuannaarnermik misigisimanissaralumut sunnertinnarpoq malitsigisaanillu ilaqutariit tamarmik sunnertissutigisarpaat taamaasillutalu aliasoruiussualertarluta."



Allattoq Malene Nøhr Demant, nakorsaq, ph.d

[mnde@regionsjaelland.dk](mailto:mnde@regionsjaelland.dk) / [mnde@peqqik.gl](mailto:mnde@peqqik.gl), tlf. +45 30 24 14 25

Najoqqaat: Malene Nøhr Demant, Christina Viskum Lytken Larsen og Preben Homøe, *Parental perceptions and management strategies for otitis media in Greenland*, International Journal of Pediatric Otorhinolaryngology, Nov 2019; 126